

բռնութեանց այլազգեաց և յանսովոր պահանջանաց նոցին, որոց վասն բազում անգամ դառն գանկատանօք գրեալ էր առ ազգայինս, եւ Եաղուպ աղա անսացեալ բանից նորա, խոստացաւ 'ի դառնալ իւրում 'ի Կոստանդինուպօլիս, կացուցանել Պատրիարք Երուսաղէմի զԹէոդորոս Եպիսկոպոս, զորմէ կտակաւ պատուիրեալ էր Գրիգոր Շղթայակիր, և զՅակոբ առեալ ընդ իւր գնաց 'ի Թագաւորեալ քաղաքն, եւ կացոյց զնա անդ վերստին Պատրիարք (1732): Եւ 'ի նոյն աւաւրս մատոյց գիր աղաչանաց առ Արքայ, յորում յայտ արար թէ ինքն կամօք իւրովք հրաժարեալ է 'ի Պատրիարքութենէ Երուսաղէմի, և թէ չունի երբէք իրաւունս այնուհետեւ միսել ձեռն յայն իշխանութիւն, և 'ի տեղի իւր ընտրեալ է ազգն զԹէոդորոս Եպիսկոպոս: Գրեցաւ ըստ այնմ հրովարտակ, և հաստատեցաւ Պատրիարքութիւնն Երուսաղէմի 'ի վերայ նորա, 1170 (1732): Այլ նա ինքն Եաղուպ աղա յետ բազում գործոց իւրոց 'ի նմին ամի գլխատեցաւ 'ի Կոստանդինուպօլիս հրամանաւ Արքայի, Յուլիս 9:

Գ Լ Ո Ւ Խ Թ .

Վէճ Յունաց ընդ Լատինաց: Տիրել Յունաց գերեզմանի Ս. Աստուածածնի և մեծի եկեղեցւոյն Բեթղէհէմի: Զրկանք Հայոց և Նեղոսթիւնք վասն այնց տեղեաց, և վերստին հաստատիլ իրաւանց Հայոց:

Ի ՀԱՍՍՆԻԼ Պատրիարքական Պէրաթին՝ նոտու Թէոդորոս Եպիսկոպոս Խորենացի յԱթոռ Պատրիարքութեան Երուսաղէմի, և կացոյց Փոխանորդ իւր զՅովհաննէս Եպիսկոպոս յԵրուսաղէմ, եւ զՍամուէլ վարդապետ 'ի Կոստանդինուպօլիս, և իշխանաւորք ազգին առաքեցին առ նա կանոնական բանս, և ընկալեալ նորա զայն՝ յաւել և ինքն ինչ ինչ 'ի վերայ նորա, 'ի բարւոք կառավարութիւն Աթոռոյն, զոր լուեալ Յակոբայ Պատրիարքի և գլխաւորաց ազգին ուրախացան յոյժ, (այս կանոնական բանք՝ չհասին 'ի ձեռս մեր):